

李中麓閒居集

李中麓閒居集文之十一

重脩濟南府治記

記

重脩濟南府治記

濟南為東省首郡不但土物沃饒而城隍館舍
五郡亦不先焉惟是府治規制淺露棟宇歲久
破落地形前隆後庳水無所於洩人無所於棲
每逢積雨少有全垣屢經葺理勞費不貲長吏
固知其非計然以土木工料破冒繁難又憚於

關白經畫甫三歲陞擢去矣補偏救敝因陋就簡天下之為政者大勢如此固不止一府亦不止興造一事云耳唐谷喬公起家進士嘉靖庚子遷郡守獲任之後見堂廡日就傾圯難為出政之區慨歎改作以歲災相屬又惠未及民不為說使乃以清白自將精勤遇事處上恭而有節御下嚴而不苛賢僚直託以腹心疑獄如見其肝膈重刑莫用吏鮮驚行枹鼓稀鳴市無狗盜多方省賦以粟易蝗練兵無虛禮士以實

麗省之郡仰承撫按諸司之所責辦雖五馬二千石其尊貴加於縣屬不多也候謁揖拜率以破暝而往薄暮而還燃炬而後視事公居之略無難色而綽有能聲非其強榦之質得於生成而剗割之才由於學問吾見其不草就則瀾倒矣越三年壬寅政成民和乃謀之同官請之監司鳩工量財取石於歷山之麓伐木於太湖之濱以平直而市顏采以賑飢而後丁夫為大堂者五間後堂稱是樓亦稱是大門二門以間計

之各三經歷照磨廳亦各三碑二座周回樹以
堅墉低窪鋪以美壤由是望之森聳即之安平
輪奐鮮明而門墻軒敞信乎為出政之一大郡
所也為費不過六百金計時未踰九十日用力
少而成功多非其調度周詳何以致是其僚友
鄭李二別駕孫吳二通府一劉節推皆贊襄有
功者讌會落成之後走書章城索予記其事因
記而復告之曰不一勞者不久佚不暫費者不
永寧然孔子作春秋築一臺新一門無不備書

者何也謹其廢時奪民也唐谷卬舉脫非善於
乘時用力雖久佚永寧不中負也況於作無益及
為不急之務者乎唐谷嘗推西安矣余出使日親
見其行事而韓野田侍郎康對山偕撰同稱之
嘗同知淞江矣而陸儼山宮詹稱之猶夫韓康
也嘗徵取至京矣以王府為眷屬不得備
宿衛仍補外僚此出於王太僕一時激奏後遂
沿襲而不改立賢無方此人心同望於聖明
之朝者也揚遂翁魯疏之矣唐谷由此內拜行

道濟時必有大有可觀者其年濟南也余為選部
郎力薦之今其政蹟視表寔之在東都侯霸鄭
洪之在臨淮何以加焉唐谷有古良之風而余
獲知人之名矣能政而又能新府治諸公之所
知者其前事或有諸公之所不及知者乎因併
記之于以傳來而繼往唐谷山西霍州人名瑞
字觀之陞任河南副使鄭名紋李名柰孫吳名
欽名九經而劉則今兵部名壽著是已

後知軒記

予家城市人事業委應酬為勞老母在堂於禮
不能遠離日惟避喧南園內園去城二餘里跨
一蹇携兩童凌晨而出薄暮而還稍得塞充字
神繹尋舊業而讀所未讀之書園無雜木栢可
三百株松止有五計其植日總四十年而已成
林雖盛暑洒然如秋遊人嘯味多藉坐長松下
園地宜栢而不松北方重松而次栢傳稱亳宜
松安邑宜栢又謂栢之視松猶伯父視公也然
則物之輕重及生性豈不各存乎地與人哉松

栢之間有一草廬歲久敝漏不蔽風雨且卑隘
如坐甕中不得已改作爲撤草而覆之以瓦左
右置牖前後爲門䟽朗空洞落日後猶能辨繩
頭字中設一扁名以後知軒夫松栢皆後凋材
也必於歲寒然後知又居之四面通明者爲軒
孰謂斯名不情稱哉嗚呼晴暖之日少陰寒之
日多經殘而教弛朴散而風厲脂委之士淪節
之臣面而不心之友接踵於天下久矣在下者
同宜苦志堅心豫養松栢後凋之節在上者尤

當揚休布和不可構成歲寒後知之期云軒凡
三楹在園之中央并迤北徑亭同經始於嘉靖
甲辰七月望日畢工於八月朔日至九月晦日
中麓山人自為之記

竹隅季大夫德政碑記

民瘼之關要在乎徭役徭役之編審難於稱停
雖之天下皆然而東方甚焉何也人情畏役里
老徇私黠吏舞文積書弄法歲時豐歉不一南
北水陸獨衝泉堤閘溜快壯鄉兵歲額京班驛

遶柴廩輸將徵調差撥團操歲無虛月月無虛
日法令滋章財力困竭久矣州縣長吏三年必
逢二審後次常勝於前在本治多有可稱以之
帶審他方每每不及得非近而易知久而習知
耶在廉幹者尚如此下此者勿論矣弊端所由
而起徭役不得稱停以目所親擊東方在天下
為甚識者諒不吾尤也竹隅季大夫以名進士
出補濱守歲丙午期當審後藩司以濱役獨最
撤審蒲邑蒲雖所屬然他方也非近而易久而

習者也受檄後不以示人佯以他事行縣群里
書鞞於庭下出其不意各報事產丁力人無遁
情冊為實錄開審日設法精備御下嚴明又善
科筭羸縮揣摩情態徃時欺弄影射之弊格閣
無遺旬餘編定揭榜通衢觀者歡呼雷動以為
家置一守未能若是其平也譬諸極準之衡物
有輕重稱量不差發硯之劍事無巨細迎刃而
解矣且文雅操持學術述作不惟一時鮮儷雖
求之古人亦可也今西夏王都巡筮仕於瀕嘗

曰惟圖惟渤海而古來循吏有龔黃濱卽其地而季大夫其龔遂歟蒲民張珂等請於施知縣將欲樹石紀實施云今審非惟便民且便於官然刻石恐非大夫意也必不得已聞其報政有期行且轉而之內彼時頌德頌功兩無心而三有益上無心於下之感下無心於上之知公以得衆德無不酬善足勸後是之謂兩無而三有焉此舉兼之矣施尹嘗以公事過臨因民之請徵文於余余文雖陋然而不敢溢美亦不解藏

善祇以積懶成病涉歲不著一言兼以見任難
之忽一日青衣走報曰大夫行矣可無嫌矣遂
書此貽之大夫名德甫南直隸太倉州人

重脩三官廟記

章俗城內不棲遊客城內外寺觀總之不過六
七處四方來者利其直廉物豐酒醇醉易然頗
以夜宿難之郭有四以東為最人烟斷處兩路
交分舊有三官廟當其衝歲月推遷風雨侵剝
殿虛蘇澁院廢花深畫壁蝸遊古槐雀噪荒涼

破落已非一朝夕之故矣。廟西繡江橋，乃武定
袁僧名無住者所造也。橋雖五泓然壯麗精巧
甃皆青石為費不下萬金。正德末年山水大發
橋遂沒而改作。今廟又廢而不修，既無以表壯
觀，又無以揅遊客。縣為東藩之景，而郭乃景一
縣者，又東三府之所經遊，而兩踞交分者也。茲
不重可惜哉！廟主洪果者，苦行僧也，力欲復之。
義會趙相等以社錢來助。於是乎名工治材，鳩
衆築土，重門雄梁，正廟巍巍，像設尊嚴，金碧丹

履不待積久遂成盛緣橋雖圯而廟存猶足以
壯觀而棲容東郭不失為最功果亦不小也僧
與會長以予林下散人每探春必過此靈境托
妻父張錡命為之記妻父行年八十有九鄉賓
也壽官而又樂善人也予性好遊兼不敢違尊
長之命乃述廢興始末畀之勒諸石以垂永永
且從而問之曰三官之名何所於始乎得非漢
之季世耶因山祭天以為天官因土祭地以為
地官而瀆水祭者水官也古人又云較三官於

絳河此非其始而何耶持教祝禱有益於
國賜福赦罪解厄有益於民因係之以詩俾後
之祭者歌之其辭曰東橋復東爰有琳宮星移
物換瓦解土崩陰廊寂寂古樹童童劫灰歲邈
金像塵蒙遊人不到野鳥為叢於惟善友感嘆
摧衷僉謀而合乃始厥工薙其蔓草載築顏墉
列楹日麗鏤縑雲封飾以塗茨蔽以簾籠浩劫
垂光炫耀流虹密衛既肅精誠感通青靈紫微
賜谷俱隆五七九蒸三官各功有求必遂恩比

蒼穹三災遠避萬福攸同九玄七祖四府八紘
聖神普照心念不空四民奔走聚禱此絳恭勤
香火考鼓鳴鐘登歌有聲拜舞有容祀非不經
神罔時恫為詩蕪劣不雅不風刻之金石以俟
無窮

萊蕪縣王許村重脩玉皇廟記

人言物理循環無定廟宇興廢有時小而譬之
人家大而國家亦若是矣嘗觀西京雜記東都
志略以及青陽宮等碑近又得西湖志讀之乃

知治世非獨福民而神亦與有福焉不然一次
兵火則廟宇一劫灰矣如靈光獨存者能幾何
哉人國家之譬其亦有以也 皇朝承平日久
廟宇創者無筭廢者咸興如萊蕪玉皇廟其一
也廟在王許村去城五十里西近岱嶽南對徂
徕北通濟而東乃蹈海大踞自其廢後不惟居
民落莫亦且行道傷嗟李子鄉人有張惠者與
本縣韓春韓恭韓道并地主韓崇各脩靜業同
結良緣以為竭虔妥靈之地至於旁穿上漏塵

煤丹堊兩壞垣墻非吾輩之責任哉乃勞心力
出錢帛兼募及同臭味者為之大殿三間卷厦
稱是兩廊十間鍾鼓樓各一座廟規浸盛神氣
如生雲流珠網日耀璇題聚香火而奏金石永
為萬靈拱護况國運與天無極是廟之長不
卜可知矣向寓京師日曾遊西山寶剎琳宮
飛樓傑閣歲復加侈即此可例他方極盛之會
西京等籍有所不及載者矣世人如鳶魚然自
飛自躍豈知天淵之大哉或曰玉皇本漁陽張

姓借白雀之助竊騎天翁白龍振策登天翁乘
餘龍追之不及既到玄宮便杜門易百官封雀
為上卿以是獨得尊貴廟而塑之何益予曰言
涉不經存而勿論神道設教使由不可使知天
下名山大川非得廟宇充斥乃奸窟盜藪耳問
者悟曰長治福民又有資乎此

介休侯氏祠堂記

禮五經而重於祭以報本追遠事莫先焉中麓
子既解官靜居每欲集古今祭禮酌其經久可

行者必自祠廟始乃取開元江都禮參之以徐
邈繆襲之說覺其未備也廟制用徐潤之家祭
筮日用賈頊之家薦奠獻薦新用鄭正則之祠
享至於識板降送陳器祝文視牲烹饌則又用
范傳式兄弟寢堂時享等儀標以李氏名目不
敢施及他族欲以是月舉初適霑化侯簿將致
政遷其鄉而以祠堂記走使見託其禮與中麓
子所定者大同小異禮本人情惟以義起至是
為益信矣按譜侯氏汾州介休縣人世居介山

距城四十里許族大而且詩禮 高皇重里甲

選其祖至道為長迄今不廢歲荒曾輸粟千餘

石饑民多賴存活事 聞 勅建義坊名鏡者

簿之曾祖也生福增享年八十又九娶郭氏享

年九十又四福增生甸與幼弟服都同事獲親

以至高年竭力承顏順心先志郭以齒落食難

乃以口進供養遺訓克遵幼弟亦壯甸之力居

多其疾也弟之事之比之父禮稍殺耳服今七

十二都今六十七將來壽筭不但如父母云甸

娶董氏生子二長天祿業農次天爵任需化主
簿善政得民清操出衆服娶雷氏生子二長天
賜業農猶天祿次天叙任寧晉主簿政與操猶
天爵繼娶馬氏生一子業儒都娶梁氏生子亦
二天秩太學生天與亦業農天祿子冲太學生
天爵子保國天賜子康國亦太學生天叙子應
祥應禎天秩子守國天與子守分康國子宏俱
業儒子孫蕃衍家計豐隆天之與善人不爽其
報矣其手澤心聲父作子述男女各守其法士

民悉稱其賢達祠之外更有遵教堂并鄉約可
世傳者况同為鄉賓非難兄難弟而何今之縣
佐乃古之卜士制惟二廟一壇止祭祖父以上
遠祖則為壇祭之侯氏子孫業儒者多厚德所
流必有列鄉上大夫祀處而傳久者但不可恃
其盛而怠於所養云

長山尹温公生祠碑記

為治有切要之言曰天下安危責守令又曰教
知民疾苦先察吏奸貪吏而賢廉則民無疾苦

而天下又安古今稱善治及善言治者莫切要
於此矣曩余在吏部以論人為職最久出使及
扈 蹕徃返不啻數萬里所接有司亦多未不
為民害者千百中而有數十人賢而廉者於數
十之中又止一兩人而已所以生民不得息肩
今天下雖安然不可不早為之圖也余既罷官
歸田不復看除目談吏治而接見士夫更簡有
司視昔不知何如竊料或更難矣章邑密邇長
山多有傳言溫公之政之善者徐而察之果若

人言溫公往來濟郡道必由章有時枉顧則見其持重謹畏與之言時政則豁然於中言民瘼則戚然於外蓋留心世務刻意時艱而人言傳誦有不能盡者政成物阜澤沛民嬉一時吏於東土者或舉之以勸其僚或稱之以勵其屬上下莫不賢之遠近莫不庶之撫按保者六獎者四太僕二司及部使者獎者十餘次以欽取選授法從在臺中有直聲巡遼陽得憲體行且巡他方陟崇階移其所以親民者而大行其道

天下之安有賴焉長之省祭安汝相民王脩身
等違祠肖公之貌尊事其中隆棟飛薨斲金歟
碧有過祠下者儼然覩公之半采而劃然聞公
之嘯聲至於百歲之後方勤香火以永其思以
報其德更伐石紀實而以記文請余以為奮嘗
交遊且兩縣密邇知之真而言可信余自以既
不復看除目談吏治而間見士夫猶為多事豈
可更為仕者致文辭哉安至二子請之愈堅云
此槩縣大衆之意特為轉達且碑記傳後知其

人以追其餘韻流風知其政以續其良法美意
後賢有資不獨永思報德云耳於是據其行事
之大略為記以貽之曰長之白山驛走迤馬久
在齊河今則請於上而歸於長而昌邑之在白
山者亦即歸之一舉兩便推奸避事者不肯為
畏上遠怨者不能為本地監運役之至苦者力
主罷之歲省千金之費東昌船夫役之至重者
則設捨以收銀兩派衆以便催科事易辦而非
仍前獨累孝婦河舊惟架木為渡壞則病行客

修則病居人公乃擇人督工橋成而民不告困
均徭解傳東方大差也一則三年一審一則十
年一換入戶登耗財力有無設法精詳宅心平
恕明察之下二差各得其當里甲節費城隍屢
修黥視倉廩賑救荒歉疏通河道徵派稅糧興
學恤孤省刑舉廢縣庭如蕭寺官宅如郵亭無
留餘無餘物其勤儉可知而待士夫則豐厚適
宜禮敬無失此皆不能備書至於已考滿就道
忽聞姚賊弄兵旋復歸縣以其去顏神不遠恐

境內驚疑又上司來者繹絡佐貳或不能支安
定接應以身任之不自知其為行客也既而飛
檄賈三齊之勇建牙集諸道之兵費不貲而事
克濟寇既平而名愈振在他人有望風而避者
矣况肯來於既去之後耶嘗讀漢書循吏傳南
陽以溉田疇潁川以興禮讓渤海以弭盜賊膠
東以增戶口止以一事可書而名流後世公之
可書奚但一事而已又嘗聞長之前令有聲稱
者如郭侯綬黃侯昭道喬侯遷岐張侯鐸各擅

一長公皆兼而有之矣嗚呼是碑也豈非前之
德政而後之龜鑑也哉公他日或為都巡或奉
特簡復來東方行縣至長見祠與豐碑必自
信其得民且筦爾而笑曰牛刀割鷄今得飽歛
矣公名景葵字汝陽號三山山西大同府人以
嘉靖二十二年六月抵任至二十五年五月考
滿二十六年二月被徵去

博興縣儒學重修文廟記

博興自有縣治即有儒學一新於成化十九年

姚尹再新於嘉靖三年張尹一壞於嘉靖二十
三年雷雨再壞於嘉靖二十五年雹詠怠於屢
遷不及修邑敝於歲歉不能修以致正殿兩廡
草薶其上塵積其下題榮內朽甃破旁傾不蔽
風雨而蝸牛篆其外露見星月而碩鼠穴其中
此不惟儒者悲涼而行道亦為之嘆息學生相
介等觸目激衷相與謀曰釋氏異端之徒吾儒
之所首斥而亟攻者也乃能苦心受戒募衆應
財成盛緣而起雄構大新其殿宇金界圍七重

之寶樹畫梁擁五色之雲華落成或為千盤之
雅會次者亦足為一方之巨瞻所謂天下名山
僧占多者也吾輩反不被若可耻孰甚焉遂請
之長教尚榆溪分教施梅石韓忍齋同心一體
師則捐俸生則捐廩未為廩生者又各捐金猶
恐不足以集事又告之鄉士夫及邑之尚義者
各捐金有差致仕趙祿暨孫學等十人則又其
尤者也董工者最公勤執工者皆雇覓力不勞
於民財不出於官人言立不使鬼止在役人物

不天來終頃地出蓋為妄興作善侵漁者設也
是役也乃義難但已情不忍坐觀况不傷財不
害民大有益而一無損者乎始工於嘉靖三十
六年二月至四月功過半而邑侯鞏昌劉筠亭
適至謁廟之初面其役即慨然於懷曰此吾有
司之責也遂亦捐俸而趨其成發蔀掃塵易朽
正傾補上漏而塞旁穿無復蝸鼠之害高廣雖
仍乎舊而丹采則煥然一新足以時居游而忘
瞻慕如聞當時金石絲竹之聲而覩聖賢揖遜

雍容之盛是後也。所脩不止殿廡門及臺端錦
秋亭亦皆整飾。衆意此事不可無記。以中麓子
文有虛名。乃屬潘生楫。崔生應鵬。唐生思恭。思
敬。詣吾草玄之廬。拜乞為文。以光其事。歸將刻
石。而永其傳。吾章脩學久矣。衆亦凜吾作記。以
失事狀。尚未脫稿。今乃先為他方成之固。不失
遠者之心。何以塞近者之口。耶。然近可坐待。而
遠不可空回。因記其事。而後謂之曰。是後也。五
材之需。百工之費。誠為不貲。使非義舉。則是魯

為長府衆人舉事似乎作舍道旁畢竟不勞而
集此可見人心之公人力之齊矣然設學所以
儲材立師所以端本歸行所以明倫考業所以
居功觀廟廡之尊嚴所以作敬畏而希聖賢也
今之學者多逞浮辭而寡真見昧實際而率冥
行工文不過欲登科第掇青紫爾縱能脩廟而
不脩行亦何足貴博興古稱坦直儉朴士生其
地由質而文宜易為力脩廟興起之後掇巍科
登上第者每三歲永不乏人矣昔呂東萊講學

無及舉業朱晦菴以書止之東萊復書曰若不
開此一踏則堂前草深一丈雖然舉業之精者
與道術一也記終以此望博之諸士加意待吾
章記成又以望諸同鄉之士云

臨朐縣重脩儒學記

述觀往古有司徒胄子之教而後能成真才得
實用漢設博士於太學詔郡國增學官舉孝廉
故其治為近古嗣是而降有得有失其得者亦
足隨時成治 明興法古學校布滿天下師道

嚴而學政備教則尊王賤霸文則崇雅黜浮讀
書之聲無間冬夏照書之火接手晨昏輔治庶
民自科貢之外他途百不一焉蓋追往古而陋
西京矣自教化弛而文體變師之上者徒以出
題發問校藝識文為能而身心道德則一言不
及下此者又可知矣士惟剽竊乎腐爛之語出
入手口耳之間以幸主司之見錄而身心道德
既無聞於師又不講於友今更為玄虛鑿空之
文而前輩渾成博厚之氣漓矣齋舍荒而莓苔

滿徑絃誦歇而博奕爭場膳堂之會食久寢綏
油之良牧無聞冬夏晨昏少有聚而舉火讀書
者且學職多是貢生考滿無功績者必謫河泊
與遠方自不能舉而責其以舉教人不亦左手
今 聖天子在上久道成化文風士習變而之
古復 聖祖之舊非一日矣因記臨朐儒學特
首述之而後及其重脩之由且駢之有學矧自
宋之紹興間金元燬於兵火洪武初始復其舊
至宣德丁未馬公愉以狀元及第為世名臣文

學之士自是彬彬焉盛矣嘉靖辛卯中都褚君
寶嘗尹於是增飾之後久而傾圮丁未光山王
君者來視篆之初即有志脩復及政成而時和
民信而可用乃斥贖罪之金率好義之民市材
於他方創陶於美壤以善手藝者執功以有心
計者董役經始於夏五月訖工於冬十二月時
則履任之次歲云殿堂門廡齋序厨庫煥然一
新恍如入數仞之宮墻而覩三變之容色弦誦
燈火充斥於其中冬夏如一日晨昏如一時也

君名家十字汝希號淮川先大夫為御史有執
直名歿贈光祿少卿君能世其家學解太極論
周官惟致力於身心道德政則尚簡省刑平徭
薄斂綽有古良之風其為教也能盡提調之責
而革澆漓之弊以復祖宗之舊而體聖天
子之心司徒胄子亦彷彿乎有古人之遺意自
以為學脩不可無記托吾同年友馮惟健致書
遠索時方居太宜人憂讀禮之外不敢他及
文事吾今禫除而君已遷官馮友又已下世前

約不可終負故為之補記寄諸新令尹君以紀遷者之美而成死者之志不亦一舉而兩得也哉

武城縣重修儒學記

武城今之東昌屬邑而古之清河郡名邑也其有儒學則自宋元始我朝因之學宮脩廢有時係乎官其地者學政廢興有時係乎師其地者二者常相須而難並盛也武學天順間一脩後迄今百餘年傾圮甚矣廟廡已深秋草堂齋

鞠作園蔬庫舍等又值以長莓苔而巢鳥雀矣歲
丙辰儀封謝南洲來尹是邑履任之初慨然有
脩復之志以為必治之於相信然後役之於可
勞乃廣儲蓄勵操持公聽斷省浮費弭盜築堤
不三年而政成知其時可乘而學工興矣請允
於當道協謀於同官托始於戊午孟夏落成於
己未暮春躬自督勸手出俸貲又斥贖金釋良
匠一以付與陰陽官王尚賢董之廟則巖巖廡
則翼翼堂齋噲噲而森森廩積有庫羞膳有庖

出入有戟門藏脩有號舍石雖重脩實則不殊
創建恍然覩聖賢揖遜之心谷而聞子游弦歌之
聲衆議此盛舉不可無述乃以尚賢并庠生袁
舜問東來委記於予予惟昔人有作道州廟碑
及袁州學記者自魏無柳子與李構之筆惡能
著薛伯高之勤而表祖無擇之美哉然學記乃
文事中文事與泛然他作不同遂以鄙意告之
曰夫子嘗賢陋巷而許不以竹長府三臺兩觀又
譏之春秋其意豈欲其廟與乎若斯盛哉得其地

而闡其學斯官師之責也地不脩非所以為官
教不立非所以為師知不能行行不副知非所
以為士然學欲真勿若剪絲為花學欲漸勿若
擊鼓催花知先而行後知易而行難故曰知得
一尺不若行得一寸至於出口入耳之長末過
四寸耳若夫知行合一雖大儒屢屢垂訓不暇
遽以之為然武城乃先聖賢經由宰治之區而
名卿文士多生其間惟願致知力行不偏攻舉
業又不泥於口耳之間將來必有聖賢之徒基

大道棟明堂者不但科目之盛而已又聞南洲
乃旌表孝子之孫而曲阜孔門之甥也母氏孀
居五十年亦已旌表節婦矣家教有素宜其施
於有政如此南洲名夢顯河南儀封縣人舉人

章丘縣重修廟學記

先王設學校立師長群弟子於中教以道德禮
樂經術教其條法養其長老而官其材賢所以
治為三代之隆漢始於郡縣立學兼立周孔廟
稱先聖先師及元始間置博士等身通一藝

者即補文學掌故射策中甲科至今言治者以
漢得人為盛及世降而教弛學校為徒設師長
為冗員弟子為虛名道德為外物禮樂為文具
而經術為贅疣甚至執習氣之偏疊見聞之障
為耳目而忘本抵糜糜餽而老歲年口雖佔得
而月長醉腹不經筭而日高眠有為章句之學
者矣攻於脩文脩辭有為玄靜之學者矣攻於
脩性脩命或更鼓舌游談閉目危坐而為假道
學者矣此無他學校不脩學政不立致然耳我

言二四
朝建學滿天下行實政而獲實效比迹三代
而陋兩漢於不居既乃學與政不繼其前而士
習遂壞於後如漢以下弊端容有之矣嘉靖十
一年後知吾章縣事者乃同年友趙文海性嚴
而明政肅而敏處事數言立剖接人一日不怠
每朔望至學以為歆士習之振起必在學宮之
作新乃選匠藝僦率徒撤淫祠出公帑費不及
民工不踰時行無負於途居無嘆於室為之大
歎五楹明倫堂亦如之東廡三十楹西廡亦如之

門兩重坊三座墻數十雉兩齋及號房數十間
宰牲貯庫厨竈各為之所碧瓦鱗次彩堊翬飛
疊栢丹楹疏薨藻梳斂則尤為聳觀十二年三
月始事十三年二月訖工中間有因寒暑暫停
者揔之不及一年衆以予乃邑人託友生劉璠
張澍李時貢持王從龍所述事狀問記於京師
予以方任吏部繁司非為文之時又脩學大事
非能文之人辭遜不敢當衆又不可轉索他作
遂擔閣至今雖琢石光潤偃卧學中未有一言

登其上者每入學見之常嘆其是予之罪也文
海以參政不祿而友生亦無一存者其以禮敦
請督工者致政通府高棟縣尹楊盈同督者乃
鄉耆徐冕王言尹暹劉豈趙夢弼張惠高龍共
十人存者惟張永暹一人當時主者與督者俱
有行檢材幹故其費省而功倍如此嘗見他處
興造用不貲而工不盛有方報完而即告壞者
又有換數椽添百瓦即申報上司脩理所用若
千餘悉自為侵漁之計又有易其扁額即稱無

前之偉績者視之文海可媿甚矣然脩學宮不
若脩學政脩學政不若士子各能脩其身三十
年來鄉試中式者大不及舊議者以為北山伐
石洩氣東橋斷而水無聲又以為學前無案廟
學並峙不如法但甲科衆而官品崇亦一盛一
衰常理然所謂材賢者又不專係乎此如魯稱
尼父漢稱褒成唐稱文宣宋稱玄聖元稱大成
至聖文宣王今復古禮稱先師或笑為東家丘
或譏為喪家衰鳳者或將撤祀於蔡京闕里廟

屢屢火災夫子之道何嘗有不尊吾鄉諸士子
惟脩身以族之可也一脩身而天下之事管於
是矣慶則著述出則功業復國初而邁兩漢
軼三代不難一切雜學如前所云弊端可無患
矣是則前人之所望於後而後人之所光其
前也今嘉靖三十八年學又廢而當脩矣不惟
人不存而事狀亦不知所在矣予乃深負愧而
重有感徘徊學舍想像奮景追而為之記以紀
前美以詔後人觀者不以為雲烟過眼及東京

夢華錄則萬幸矣文海名瀛陝西三原人歷任
有赫赫聲縣左立生祠亦以脩學之功居多云

尊藏誥勅樓記

士有履仕途三十年官階已峻猶未沾 誥勅
命之榮者矣亦有拜官一日而即得之者矣此
存乎所遇耳渺予小子起家進士初受戶部主
士因 皇子生父贈承德郎母封安人予及妻
封亦如之繼陞吏部員外郎又因冊封父奉直
大夫母太宜人予亦奉直而妻則宜人云 誥

勅赫奕 綸綍褒崇數年兩遇 恩為殊恩遇
為竒遇矣校諸一日即得者卒歸於同而三十
年不沾者不但過之矣特起一樓尊歲其中歲
時捧讀一過恍如 帝語之親聞 天顏之在
即也傳家之寶奚啻百朋而萬鎰哉惟願子孫
世竭忠孝以報 國恩聊附數言于此其詳更
載家訓中

心南樓記

園樓軒敞目可遠視四方心亦可隨之而四又

嘗竊學東西南北之人而樓何獨以心南名爰
自十九世祖三遷而居始定田廬丘隴俱在南
山之南所謂歌哭於斯聚族於斯者也每登樓
吾心所之不於他而獨于南因名樓以心南而
并為之記云

藏書萬卷樓記

藏書不啻萬卷止以萬卷名樓以四庫貯類不
盡乃做劉氏七略分而藏之樓獨藏經學時務
摠之不下萬卷餘置別所凡五書文明火象也

又天地精華多則為崇古之善藏者每分之庶
不災於火吾樓書不過萬以此名山大川其藏
所也奚必於樓詩三百蔽於思無邪三字手部
論語猶歎於節用愛人有一言而終身行之者
又奚必萬卷而况不啻萬卷也哉既記之而復
繼以詩以見吾志 詩云古有楚史邈焉寡儔
三墳五典八索九丘有問即知隨其所授藏書
之富更有鄴侯雠床插架充棟汗牛諸子百家
六經贅疣多岐亡羊是則可憂辯也如賜藝也

如求科列文學子夏子游兩端四教無言更優
吾欲從之不得其由藏書萬卷聊以名樓

注目樓記

樓本高氏居剝於颶風驟雨及李子為主督工
計財刻日復完設扁加名今為注目樓云夫登
高則望遠身在樓上目力所注千里近在眉宇
此山後寨樓也千里猶近而山與寨無庸視矣
然不但恣登眺堪題詠而已田有情夫及偷兒
以便於瞭望無不知戒者不出戶限而瞰田有

餘力雖名之曰瞰田樓亦可也

三宜樓記

普濟鎮之北園名海套園之北樓出樹杪是為
三宜地曠而高樓麗而壯以地名樓樓與地而
盛顧舍是而三宜之不亦盍且左哉嗚呼高則
無障曠則無際麗可娛目壯可換身故夫月湖
皎皎與雨祁祁雨雪霏霏以壯麗之居而據高
曠之地倚欄凝望三者有一不宜者乎時或曲
如鈎潤如酥輕如絮細之有一不宜者乎又或

爛如盤勢如注大如手巨之亦豈有一不宜者乎此之謂三宜不以地名而址在其中矣常讀謝希逸陸雲及謝惠連月雨雪三賦有一得焉因樓而識其所得覽者請先三賦而後登此樓則所謂三宜者不待吾言而亦得之矣

平樓記

三十年前四鄉平樓可屈指數今則民貧盜夥十村而六七雖負郭亦有之甃皆甃石大約高二十尺上下平其顛利於飛石禦敵緣原祖居非

有厚積招盜樓何為者高三十尺耶以先隴前
峙族人環居高平可以登望望隴起孝望族起
敬孝敬有資乎爾此所以必樓而樓所以必平
且高也

待月樓記

詩謂城高月上遲又謂山高遲得月吾樓南近
城而東對山自望後必待山吐而城掛月始得
賞不然停杯煞歌懷遠徒隔千里帶影不成三
人紙付之浩歌而已矣樓以待月所以釋吾躁

心推此而當待者多矣抑又不獨月云耳

四望樓記

樓稱四望者何北女郎而南距山東長白而西
華不注望之近在几席間四山皆可卧遊也人
孰無居而吾獨有樓人孰無樓而吾獨有山章
俗不比他方城起高樓四隣必以為窺見室家
止之不止且訟之吾宅後樓雖高却不方衆目
得望山而遙為之主則四山者四座嘉賓也自
官罷而閒因之興豪而遠不然得失闔於心奔

走勞其形雖有時登樓茫茫焉張目四視則四
山者四愁障也有所懲戒乃自為之贊曰人惟
羈於官雖覽勝而心愈煩吾惟久於閒故望遠
而興不闌樓高三級如在雲烟可以叅禪可以
養丹然非所好也惟蓄山海經地里編與夫青
城記九域志輿地紀而已焉吾其迹於佛而出
於仙日惟讀五書以望四山竊仁者之名以求
其年者乎

長春樓記

種花利於養禾然難把捉校數歲之中得失半
焉得則市銀錢多而易鄉人日綿為硬貨地
宜種此者惟張林鎮東西一帶但有百畝者銀
錢之外雖家有數百指衣布而襯綿無不溫暖
如春長收則長春矣農人覬望豈有涯哉吾堂
既謂之暖餘則接不謂之長春可乎

近濟樓記

濟河去城六十餘里去村止數里而已以地遠
而直廩是故有地五頃以地多而望難是故有

樓五楹地以遠多樓以多設大抵瀕河皆沃壤
宜百穀樓號近濟其亦幸乎其近之也歟

連壁樓記

此白塔樓也然不甚高仍舊而稍增飾之與懸
橋小樓相接如連壁然遠可望阡陌近可望塲
圃省稼省耕不勞餘力詩有之稼穡維寶取名
連壁不惟肖形亦從而貴重之云

有埠樓記

高埠埠高而地平村落乃在窪處聚氣藏風亦

一得所樂土也高樓南出北與埠比肩足以發
騷人之逸興消暴客之邪心此李氏故物也而
予以同姓得之然又不但高埠普濟張林步村
油里鎮皆同姓者也事出不偶因賦一韻兩絕
句揭諸樓之最高處 高卧擬袁安高抗擬元
龍二人無不可但不擬揚雄 物本無定主得
之幸向宗示人何不廣四海檢堯封

覽勝樓記

是樓也在水寨之南隅下方上平高澗俱二丈

餘對樓有二池一魚一蓮遠樓皆瓦舍一廳兩
廂獨壯地本卑下營造頗費而樓費尤不貲登
之不惟盡覽一第之勝而一鎮之農商動定一
邑之山川迴合其勝槩舉在覽中因題樓以覽
勝而并紀其實如此

是亦樓記

薄產多樓鎮有樓惟淺井蒞不樓不鎮然去明
水鎮纔二里許樓雖不雄是亦樓也是以以是
亦名之田皆可水杭稻得利獨贏是樓雖是亦

而田不是亦也是以亦記之如他方

夙興樓記

長春樓之南俯臨通衢者夙興樓也商旅啓行農工出作必經過樓下譁然如市每月四九市日又不但加倍而已樓居者雖熟睡亦即驚起事事可由此旌勤而策惰語云一日之計在於寅一年之計在於春一生之計在於勤是則夙興者又長春之本也

場圃樓記

大允村坊宅後有樓謂之看家樓吾宅之在山後寨者正人烟鬧處墻潤而壯屋密而嚴有樓不專看家為一場二圍設也時或蔬果盈圃禾麥登場只令一僕據樓坐望雖巧於盜者亦不能售其奸樓舍看家而強名場圃其亦有以哉其亦有以哉

二用樓記

第左而南向田右而北繞者繩家莊也場前故有樓便於場而不便於田稍後更起一樓而高

搗便如前田則一覽無遺一物而有二用者吾
樓是已取名若迂於義不亦似乎哉

河上樓記

城南河畔有樓中突而西攀水勢蜿蜒抱樓而
北之構者王氏子也予嘗游而竒焉不意王已
而鬻速予即其主也村城舊稱王家樓今改名
河上夫樓為河上樓則主為河上公有不待言
者矣

愛蓮樓記

樓作於今而基仍乎舊作者中麓子而基則遠
驛丞也樓邊有池蓮可愛取以名之竊自附於
瀟溪周子後

壤白樓記

嘉靖庚戌西南鄉連三歲不登以黑壤逢旱故
耳北鄉收入如常壤白而鬆易種而無草田家
有恒言黑壤看苗白壤喫飯雖有堅樓雄出魚
僻在直北一方李子猶市而有之貪夫務廣地
仙人好樓居况壤白而鬆樓堅而雄者哉

探漲樓記

梁縣稱美田必首大溝厓夾溝水淤宜麥宜秫
不用糞力所得倍於他田然淤雖有利不無衝
決之患建樓以探山漲以厚吾防縱有敗我濯
龍之怒可無誰復黃鵠之謠矣

逍遙樓記

龍山鎮屬歷下與吾章接界與吾村連壤居在
鎮中田尾居後今太平日久生齒繁多而盜賊
充斥又以其屬異縣也構樓以防不虞顧諱焉

而以逍遙名之夫不虞防而後可逍遙行樂矣

西成樓記

樓歷四時獨名以西成今歲惟城西桑氏蒞先
旱後蝗收入不多樓名翻若幸之者夫樓作之
雖非一時其落成則正西成之候耳堅實工緻
見者謂為吾章第一所以積久而後成又土方
景沃饒前乎此者常得其利諺云薄地十年有
一結美地十年有一缺農家道其常而已矣

煙樓記

上古燧人氏肇火食以易茹毛飲血之陋潘尼
以為其用不匱其變無方然火有燬有煨有燹
妄行燔原則為災故有封人掌火而火禁火戒
則又詳於晉成公以是知火有大利亦有大害
如延北關越東家不能曲突徙薪遂使焦爛為
上客可慮也予家炊爨晝夜不息各村屬續供
薪時或乏用以食措衆多而賓客接踵耳厨室
原架木為之如他人家歲久梁棟燻蒸已腐數
次幾走火得家人早覺撲救免予每出門必丁

囑加慎外宿心恐恐不下數畝券以甃石以工
大費多一時不能立辨歲己未月甲戌日以初
九丁丑良乃撤舊貫築新基橫石疊甃高丈餘
觀者咸稱堅壯中方用木戶牖踈朗上結一長
亭則高聳數丈餘矣雖薨不鱗棟不虹遠可望
數百里近則盡攬一城之勝三面當山非若背
山起樓者萬井咸聚一塵不飛檻風可清暑夕
簷月能敞高秋春華冬雪更出奇觀休文八詠
桓譚半城郭子百尺十洲記所謂五城十二樓

吾固不敢僭擬然為日不滿百而匠作則數百
傭工則數千數年所積甃石木料用之罄盡定
名烟樓而對扁則浼楊東江蘇雪簑二名筆至
季冬二日尚不雪不寒冬行春令衆以為憂吾
方幸樓成不記其他已而寒雪驟至矣內眷尚
未移入先與客登而樂之爭覩飛煙直出淡抹
濃粧散綵霞籠殘月逗寒雲飛輕縑曳素練曉
迎旭日暮鎖長空初止以為日月飲食之資今
殆為近便觀遊之美而深閉豫防亦在不言中

矣贊曰使天早一日寒吾樓不能覆瓦與挑簷
使天早一日雪吾樓脊不能條而頂不能結惟
寒雪各遲一日吾樓得以完其工而畢其事據
跡雖是人為相時似出天賜嗣後飽食安居可
不揆厥所自喜極自為之贊聊以紀其實而繼
吾記

有年樓記

古稱田家無五行水旱卜蛙聲又以醉人為瑞
今歲庚申天災流行春不雨至秋七月蝗復蔽

天遍地穀菜俱不熟饑饉甚矣池不聞鳴蛙道
不逢醉客吾樓借舊積適以是歲成之取名有
年苦中思樂亦若西成樓所謂道其常也自此
漢甸金穰日紀洪庥於鳳曆周郊火退歲書大
有於麟編千里不齎糧同貞觀之世五穀皆熟為
有年如左氏所述農人之望年與商賈之望利
仕者之望遷其心豈有二哉樓在相公莊宅後
塲中翼以二敞棚貯農器陰雨則以刮板收粒
又扒收禾原與北園相連恐看望難而踈失易

也改遷今地自幸近且便云

延客小廳記

宅有延客大廳園門內更為小廳無亦炫美而誇多乎大廳衣冠揖讓小廳壺矢留連非大廳無以作敬畏非小廳無以罄交懽一則禮樂攻吾短一則山林引興長者也廳構於辛酉夏五記成於六月初三時因延客遂對客立書之

中麓書院記

吾章城內宅價高而隙地少近學宮有園一區

計地三十餘畝中麓子購而有之喜其與宅居亦近不但學宮而已尋復稍斥其北為之堂者五楹名以藏書萬卷繚以堅垣堅以天門門內有一亭一坊二廳又將廣列號舍總為書院以待學者而人蚤以書院稱之矣從衆意扁其門曰中麓書院云夫以書院著名者無慮百數而尤著者古則海陵白鹿白石今則正學大梁河東湖南而陽明甘泉在處有之胡安定書院原在海陵後直講太學生徒至墻舍不能容朱晦

菴年四十始知南唐講道白鹿鍾王淮偽學之禁
不能奪而劉鑑元之白石聚徒亦盛陝之正學
汴之大梁蒲之河東濟之湖南人無異議陽明
甘泉獨蒙譏訕而所言是處自不可掩也然有書
院則有院主無非以官師為之中麓子世所指棄人
也學有媿於前政有媿於後出無益於國退
無益於鄉方欲執經問難於達人雖構書院而
可當院主哉自恃與衆學者頗有一日之長兼
有一得之愚未及會講先以鄙意首告之曰古

之所謂學者一焉而已矣後世則色色各別種
種多端聊舉其槩有道學有禪學有脩養之學
有法律之學有詞章之學舉業之學士之未仕
也則攻舉業初仕而清要則事辭章郡縣則專
法律久之談道學嗜脩養而禪則其歸宿之地也
衆學且勿泛及請以道學與舉業言之 國制
舉士初惟孝廉方正賢良繼則明經重而辟舉
輕今則不行辟舉久矣士有志世用者非由舉
業莫達邑庠鄉試有數次乏科舉業正在所

急顧以道學先之不惟有孤學者之望且有乖
時王之制矣獨不思春誦夏弦秋禮冬書非古
人舉業耶道學緒餘即舉業舉業精妙即道學
嘗細觀近時舉業發揮題旨伶俐纖巧用字新
奇命意欵曲迴護照應則有之矣而無前輩渾
厚博大真誠之作允以為人之心雜之耳方終
讀書即冀發身古人謂透得利名一關便是小
歇脚也况解講體貼之功疎而記誦剽竊之習
成是又舉業之下者去道愈遠矣上古無傳人

中古無傳事近古無傳心先天一晝理無遺蘊
叔世多言書又冷灰或以博雜荒其心徑或以
粘帶迷其心竅或以茅茨塞其心源血氣鬱氣
之偏夢覺流浪雖云學道其視舉業反不及矣
必也省察操存篤實踐履堅為己之心倍反躬
之力窮經明理動心忍性破塵緣而求實際却
意見以契真機以之而為舉業根據義理之奧
發明賢聖之心與前輩渾厚博太真誠之作殆
或過之甲科盛而鄉試不必言其措諸事業有

光鄉國蓋舉業有悟未徹而律進者未有悟徹而遺一人者也。以之而為辭章羽翼六經貫穿百氏筆鋒文采如水飛於壑而日麗於天以經術而飭吏治以弼教而先明刑非若申韓之刻是外可無老氏之玄而不流於陸氏之禪矣。聞吾是說者初必愕然驚久必躍然喜而終則克然以飽矣。書院創非一日然五蔬蔽於繁葩三徑鞠為茂草。今歲夏五稍加備治而號舍尚無餘力以待豐稔成之庠士王茂實昆玉及徐宗

吾韓汝立將約衆親賓賜賀而難其文者數年
矣吾因自為之記以答衆意賀則不敢當日後
人材或有所成就若請名公為文以償吾之記
而表吾之書院則不敢辭爾

我靈臺記

新樂誠軒賢王使使持書相示曰我靈臺乃端
惠先王考養心之處也築在嘉靖辛丑抵今辛
酉二十年矣久而有當修飾者辛巳畢工不可
不文以記之乃以記文委之中麓山人山人因

對使辭之曰誠軒已自有佳記矣茲不已複手
使知其意應曰前記乃初築此則并修飾記之
耳山人乃嘆曰使乎使乎記可但已乎夫人以
一心而為靈諸念雖異同是一心之緣起前心
是有念妄心動而有迹後心是無念真心止而
無形有念心如物象可思量無念心如虛空不
可推測所謂明鏡亦非臺本來無一物者也座
客聞言以為出於禪心不靜虛則容神不靈能
澄其心則神清而三脉通靈矣故虛其心不見

可欲使心不亂所謂洞房紫極靈門方寸也座
客又以為出於老心具五行之理以虛靈故也
心比性有迹比氣則自然又靈靈處是心虛靈
又是心之本體心官至靈歲往知來知覺是心
之靈所覺者心之理能覺者氣之靈也心麗於
陽而乘其氣無間於動靜即神之會也陽主動
晝則陰伏歲神運而魄隨陰主靜夜則陽伏歲
魂定而神蟄故心大則百物皆通巨極無際細
入無倫前乎開闢而未嘗古後乎叔季而未嘗

今故有比之以火者有比之以鄩鄩者而靈臺
則尤親切著明然有主則虛神守其都維以敬
為主心之所以生而靈也所謂敬者聖學之成
始成終也客以其言出諸孔孟程朱即可為靈
靈臺記因書而授之使者父子一心虛而受書
謂其臺曰靈臺亦可也至其造作之詳及橋洞
名義之異一覽前記自當知之今記直據靈臺
為之發揮云

聖上龍飛之八年予與浚濱先生同第進士所
領成均袍服長短各不稱體乃在東闕門易之
以爲有同袍之義衣鉢之微官階或得交承事
業或相比擬其後予由吏部陞太常而罷浚濱
則以行人選御史罷而復起起而又罷竟不如
所逆料今嘉靖四十二年追念知交致書慰勞
予之書辭大意言三十年不一見面九百里不
一通書人生有幾回三十年耶高才宜不止於
斯據理必當大葬然時已逼矣天未定耶浚濱

復書惜別勉學之外無懟怨之聲惟以記其書院為懇托及發其餘函一乃所註書解一乃所著文集而集中有自製書院記及湛甘泉陳文同兵記者予將何所置其喙然甘泉其業師文岡其縣尹子則其年友也人既不同而情亦有異教詔之於治隸治隸之於切磋事既不同而言亦有異其創造改作之詳門堂廡亭之制不必贅及因書院而有感於他方因記書院而有感於近日 國初學無多端教有成法立儒學

足矣乃又有書院設教官足矣乃又有提學提
學始於正統中年書院盛於嘉靖初年今則多
不可言矣提學書院俱不可無而書院似不宜
多多則災土木費供應而紛立門墻長院設教
者安能一一得人耶自予所傳聞者海內書院
十餘處其不及聞者何啻數十餘處哉大科以
甘泉解梁以涇野鈴麓以介溪沅則有明山汝
則有篤志平樂祁門則有道鄉有環谷王官在
蒲州弘道在合江東山在潞安而百泉在輝縣

東接練川岑山以地得名者也。顛濱安定和靖
以人得名者也。浚濱書院與其有實行者同軌
而崇虛名者背馳。此其所以可記而記亦不嫌
於數也。人士有來自其地者，往往稱其身教克
修，師道卓立，植行以明倫，考業以居功，施物如
振脫，取人如投滿，足推廣天朝嘉尚儒術教崇
政本之雅意。由此弟子可材，風俗可美，不籍官
勢而施於有政矣。買地共六千七百三十畝，以
三十畝作義塚，以三百畝供祭祀，以四百畝養

老幼以三千畝待來學又以三千畝為貧士婚
喪之助從學者三百餘人閒居者二十餘年九
卿六科十三道保薦者三十餘人獨大中丞毛
介山獎檄為能得其真而槩其素略舉數言以
見之餘固不及悉述獨持風采鳴鳳鳥於朝陽
抗志澄清磔豺狼於道踏浩然無愧寧辭三黜
之嫌展也大成不佞五窮之送恥曲學以阿世
期行道以濟時金百鍊而愈鋼河九折而必海
至其辭獨祠鄉賢而拓之以為諸生講學之地

尤燕人所難能在官會闢大梁十三書院擇士
隆師以成其教今又構洩濱書院會友聚徒以
闡其學是豈以隱顯二其心者哉洩水發源於
平山入大陸而近寧晉晉原羊舌氏食邑書院
在洩之旁因名之曰洩濱書院先生名駿字天
章其別號即書院之名號云

張氏遷塋記

世有樂於訪友而忽於迷其宗勤於治田而怠
於掃其墓有地盡穴窮城隣路近河害村防猶

顧戀不肯舍去者又有酷信陰陽兄弟鬩于墻
隣里訟于官甚至遠塋偷葬因之忘其所而失
其派者多矣諺謂拙田叟拘拘擇地窮村夫歲
歲遷塋惟止其所當止而遷其所不得不遷斯
則孝子順孫不當以田叟村夫目之矣邑人張
悔菴乃先君密交後又忘年與予為會長素亦
喜讀陰陽書但不失之酷信耳嘗拉一二知友
披閱家乘指點祖阡勒狀請予記其新遷塋於
是據其手狀并其口述而為之記曰張氏原冀

州棗強人金季以河汾移家濟南東北地名老
僧口祖有諱保配許氏者遺塚尚存於彼元有
西臺御史碑久剝落名字無所與考諱文質
者則六世祖也配吳王二氏男女摠八人占籍
章城東街而墓兆則在城之東南一里外文質
生子衍次子簡簡配崔王二氏生子瑄次權
配耿氏生子淳次溥溥配盧氏生子尚德次盛
又次磬盛配潘氏生子師雍即悔菴代州同知
次師閔德府典膳富甲一邑以差繁久不及舊

梅菴一派俱由次子出次出皆賢兆已穴窮而地盡雖城雖不遠猶為無害但在清河濱而古路旁樂子村落盛且有防遷營所不容已卜地難得莫良梅菴遂自行倒杖袖藏錦囊周迴原隰登頓巖岡徃返數次始得地於蘆山之陽去城十里許藏風聚氣真佳壤也乃遷蒞父感從以母潘繼立時則嘉靖十八年六月二十四日也先世嘗南遷矣既又東遷矣今又三遷而更東矣縱有碑記猶恐如御史臺之磨滅而况可

無記乎哉予祖原自隴西徙居於此有一摠碑
載隴之世系最詳且多貴顯者嘉靖改元陳靜
齋巡撫山東每一里社立石刻鄉約族有不識
字者磨而用之予時方幼不曾讀其文止聞之
長老云云徒以為恨有言墓中誌銘可考者無
從出之向為大父作表亦只擬碑刻之見在者
耳以此觀之悔菴之亟亟記其遷葬真有以
鑿寶許文簡公在他處掘土得其上世事官
秩宜其劇喜大驚刻書傳之遠邇也悔菴又嘗

謂予曰古雖不祭墓吾欲祭祖於冬至祭父於
立春朱子曾以為不可今惟竊取程子之意於
禮則何知予曰義也義者禮之實協諸義而協
者也禮因未之前聞然可以義起也先王之祭
川必先河而後海或源也或委也所以教民反
始也每壘雖春秋並祭之可也是事似亦可記
因并記之

姜烈婦楊氏碑記

烈婦乃子南隣楊一元之女而東郭姜守身之

妻也楊蓋三世積德樂施而姜亦蹈道守分素相契合一得子女便自許婚姻而媒妁特作名目云楊之子女八人而烈婦為之長姜子四人而守身為之長烈婦生於嘉靖四年十月初九日年十七而字於姜時則四親重慶三第同居奴婢衆多應酬繁冗烈婦事上處下顧後瞻前無不孚其孝愛之心得其役使之當者至於織紵裁製浣濯饋饗事事有條段時時無遺夫家因以裕人羨其賢守身為庠生有名由其外交

得益友內助得賢匹云翁諱蓋臣聽選未旋官
而歿烈婦朝夕哭泣於帷幔之旁祭奠於几筵
之下姑歿亦如之姑以季子為憂烈婦則待小
叔尤厚衆弟欲析爨烈婦即勸夫從之不從或生
嫌姪生而骨肉情傷矣貲產約為四分讓其美
而取其一分薄者人皆稱姜生之公殊不知太
半烈婦之力也歲戊午七月姜生寢疾烈婦不
離左右不間朝昏察寒溫侍湯藥有虔心而無
厭心有戚容而無情容至十月既望藥不投而

疾轉劇烈婦垂涕語之曰妾雖不知讀書嘗聞
吾秀才第惟中及君平日之言曰一與之醮終
身不改又曰婦惟一德從一而終嘗見鴛鴦這其
侶鴈失其儔有至死不配遂死不顧者可以人
不鳥如耶君儻不起吾亦不生矣妾生顰眉而
然之者再至廿六日果不起烈婦號泣擗踊絕
而蘇蘇而復絕復蘇乘家衆環哭即入卧內自
經母氏覺之急不能排闥乃破牖解救水漿不
入口者四日冀得早以死從母與女眷苦勸強

哺之粥湯畧二沾唇潤喉而已闕之愈嚴意不
得遂日惟抱棺悲痛有時咄咄獨語若與姜生
相對者自言常覩其貌而聞其音若非思成之
驗是亦同歸之幾歟人病將死徃徃梟鳴其家
世俗以為鬼使來喚烈婦獨喜聞其聲製素服
藏之笥而舊日色衣悉取而焚之恐聞者悟其
意乃澆醢於焚後以亂其臭姜生所讀書冊亦
即焚之久之煨燼堆積歛時實棺足可供用間
嘗謂其婢曰人言蝼蟻貪生吾則以生為苦以

死為幸母及諸親柰何以苦事強我而使其夫
不幸耶婢中有名盛兒者年方十六感其恩義
情願同死雖烈婦不之許而女志則不可回至
二月十九日寒食節祭掃墳墓邑俗傳襲遠矣
烈婦乃備祭品香紙令諸婢詣墳所諸婢以日
久心懈猶以盛兒在家不料其給亦不料盛兒
之歎同死也諸婢甫出烈婦即閉門浴身理髮
着所製新服另設靈榻束書為枕以有夫手澤
在焉搗所戴素髻置篋巾內遂復自經於棺側

而盛兒亦經於其旁若生前侍立然及祭者歸
而死者久矣雖踈遠素無往來者亦皆弔而奠
之可見天理之在人心有不容已有不可泯者
矣昔皇甫規之妻荀爽之女死節漢史以為婦
事高郵妓毛惜惜死於榮全之難猶得立廟錫
封蓋旌獎義烈以立世教不以貴賤限之也盛
兒乃良家女伏事其主人者固不敢僭擬雖謂
之雙節亦可也烈婦素溫巽柔嘉而其英爽決
斷若此蓋有丈夫所不能者彼斷髮刑形又其

細者也聖如夫子猶謂女子與小人為難養况
可得其同死而無異心乎載觀古未死節者或
逼於盜汚或苦於勢奪或有饑寒之累而無強
近之親四者必居一於此烈婦非有盜與勢豪
苦逼又親有足仗而貧非所憂年雖三十有五
尚朱顏如童綠鬢未雪乃能視死易如朝露輕
如執毫其志操如嚴霜烈日凜凜乎不可犯而
皜皜乎不可尚此其原於性生由於家教而成
於夫之感化皆不可誣也識者以為姜楊兩姓

素以善良稱於衆口而協於群心天特以烈婦
報之從以侍婢事出稀奇予以驚近見而駭遠
聞日後申之禮官請表里宅書之太史光照簡
編世之老死徒死者何限是則雖死如生矣易
曰恒其德貞婦人吉恒貞者婦人之義而死節
則其義尤烈因以烈婦稱之婦德不恒則非婦
人之吉因之凶於而家凶於而國者有矣然豈
家國之幸哉雖然慷慨殺身易從容就義難所
謂盜逼勢奪因而奮不顧身此殺身之易也而

烈婦委曲處其死非惟事稀而奇蓋亦義就而
難矣是年十一月初五日葬在女郎山之東攝
縣事者藩司都事葉公義其事聞之當道而禮
祭之繼乃新尹涇溪董公主其禮而恤其家已
有合葬誌銘納之壙中而隧道碑記又屬於予
予以冗病未副其請恐歲愈遠而響愈微如逮
經生妻子氏于躋妻弭氏孤苦守志一則五十
餘年一則三十餘年雖三尺童子無不嘉其節
而稱其善顧乃未聞於朝又無文其事者何

以傳來世而化當世哉嗚呼可慨也已姜揚子
弭四姓皆章丘人

原性堂記

茶陵有大人君子張龍湖者生為保輔歿謚文
隱素與中麓子善嘗同陪祀郊壇乃避衆獨執
手相語曰天下有不可無吾文而吾不能已吾
文者原命原性是已原道原教俱有作者考選
庶吉士曾以原教命題間亦能發古人所未發
而命則未之及性雖及之然而未善也程明道

雖善乃定性而非原性也尚以為在鄒時少年
之作若原命與性非老筆宿學無可屬者方今
之世不吾則子計之熟矣盍勉諸諾其言而藏
之於心今二十餘年矣近城園有一堂已名之
曰面山矣客有過而謂予何不改稱原性乃捨
然有感於前事而欣然即易其舊名予方
觸而即發不知客何所見適投其機乎客
從而記之曰性學不明理路多岐世不得平
由之自繼善成性肇端於易若有恒性引諸

審則性與天道猶不易聞於孔門至孟子性善
之說昌而高談性命者始衍蔓於天下後世矣
程子謂天所賦為命物所為為性朱子謂受者
性之所受者理也而程子之言亦云然至其由
太虛有天之名由氣化有道之名合虛與氣有
性之名合性與知覺有心之名形而後有氣質
之性善反之則天性之性存焉尤為真切而著
則曰善及則有率而脩之之力矣性者道之形
體心著性之郭郭身著心之區宇誠成天下之

性性立天下之有情效天下之動心妙性情之
德曰妙則有主宰運動之意矣人生而靜天之性
也感物而動情之欲也物至知知好惡形而善
惡分焉有流而為惡者非性所本有也是皆先
儒論性有見之言因無嫌於直述然以予論之
理則如水之有文理性則如水之有剛柔松性
凌霜柏性盤石竹梧疎秀茶梅冷淡荆棘刺
檉檉羅經荼蘼顛弱皆其性也不獨木然如大
性燥水性溫大黃性寒附子性熱馬之性健牛

之性順皆與生俱生者也。生之謂性。告子亦不
為失。但未能兼氣言之耳。如韓昌黎原性有三
品之說。亦坐此失而猶為近理。若荀楊蘇胡則
失之遠矣。荀卿言性惡。楊雄善惡混。東坡以為
未嘗有善惡。五峯以為性無善惡而善者乃嘆
美之辭。至如盡性者竭盡此性而無餘。養性者
直養此性而無害尊德性者乃廓而大之。非恭
敬奉持之意。道所由也。極高明以下四事皆道
問學之功。問學道而德性尊矣。若四而八之分。

你存心致知則非也心大意小之說是性大心
小之說亦非也螻蟻有君臣之義虎狼有父子
之仁鴛鴦有夫婦之別鴻鴈有兄弟之序鷦鷯
有朋友之情此其通者也本然之性也然餘皆
塞者也物蠢而塞不能通人靈却多斲喪惟聖
人能主靜以制其動衆人則因動以失其靜聖
人能以性而御其情衆人則因情以鑿其性性
靜者也情動者也脩此者君子動而吉者也悖
此者小人動而凶者也時而脩時而悖焉動而

悔吝者也甚則與物無異如草木之無知而禽
獸又何難焉朱傳謂氣以成形而理亦賦物不
能擴充與之全理不亦為虛設耶惟於不覩不
聞而戒懼因莫見莫頭而慎獨有此靜功然後
喜怒哀樂中而和矣以是中和致之天地萬物
而天地位萬物育至此方及物矣天命率性何
嘗有物耶中庸憂道學失傳而作物亦可寄斯
道之傳耶然有天地之性有氣質之性仁義禮
智天地之性也知覺運動氣質之性也天地之

性主理氣質則理與氣雜言之未有此氣先有
此理氣有不定而理則常存性未動而情已動
心包性情而涵動靜者也心能體性猶天能體
物也人須變化氣質氣質變只是本性所有者
耳自天地言則善在先性在後自人言則性先
而善後但是理無形湏于性上體認故性字從
生從心一元分為二氣五行播於四時細縕化
醇太和保合生來具此理於心天然自有之妙
敷錫於維皇降衷之初命即性之流行而不已

性即命之一定而不移如是而成性如是而成能蓋天之明命民之秉彝也性本至順大順之而已性本至足各足之而已人性上不可添一物性分內不可減一物物交自有外之感吾性有不容已之真無性則無情猶之無水則無波性出於天才出於氣氣出於性無氣則性亦不可得而見焉如人方端坐可喜可愕一切動氣事未經其前則其性之剛柔善惡何從而知之然斯道之在天下其未形也固渾然而一體其

既形也則燦然其殊名失傳在於不能識其義
得道貴在窮其原故曰天命之謂性率性之謂
道記成大書高揭於堂之中央言辭淺陋義理
支離聊以近荅容意知不足遠慰龍湖不學便
老而衰亦以筆力素止此耳噫是堂也北負城
垣而南連捲室西臨古道而東望長河凡三楹
而中楹出廈材木工食不足匠役作輟無常始
基於春三月苟完於秋八月至次年癸亥猶未
黜聖而采飾或謂堂得五楹始稱其地此已竭

力若復勉強造作然豈率性之謂哉此後或歲
豐而力舒當更構一堂將名之曰原命并為原
命堂記云

水風卽吟樓記

臨泚居之前突起一樓下為門通來往上設榻
恣卧吟客有避風而登之者鈎簾北望大河喜
謂予曰君欲記此樓久矣竟不能踐其言乎予
笑而戲荅之曰此予事而掛客懷何也不以食
言而肥不因苦吟而瘦誠以數語為記請覽而

哉正之如何夫天之噫氣為風地之陰氣為水
實則交相感而迭相乘風吹水涌曰波風行水
繖曰漣風微水如鳴絃風靜水如沉璧風急水
如戰鼓風怒水如驚雷速其行舟者風有意也
任其拍橋者風不管也不但為天下之至文而
亦天下之至音音徹卧中興發醉後而詩意有
出言外者如以沙為隸以漁歌助予吟懷者又
不止水風而已樓高而聞之最真信口朗吟詩
數雖多俱不曾落紙筆且多誦古詩及近時名

水風卧吟樓之所由作而記文之所由繼
作也

遊觀藏洞記

人生貴在適意適意不在奇人生難在會心會
心不在遠然非奇遠不足以推大觀而肆遐踪
鷗鷺棲息一枝鯤鵬扶搖萬里但其鍾鼎者以
山澤為楮稿耽超曠者磨市朝於桎梏蓋樂生
之性均而殉物之情異也予自齠年遊庠序即
慕齋仁智之好而輕仕進之心將激清流以濯

纓纒高岡而振響及獲仕途官戶部在京則
皇陵諸山無不歷覽而西山嘗兩至焉出使則
北居庸西太白終南賀蘭皆其所嘗身之者及
在吏部隨 駕至承天陪祭 頌陵五款望其
二而登其三會因催蠶事將及南都以改官理
罷官後屢約江午坡羅念菴呂江峯熊南沙唐
荆川王遵巖諸相知同遊荆之次當關之次在
江右之匡廬浙東之天台廡宕川巴之峩峩
閩予以懶病不果往羅唐熊王四子雖未嘗

然已如約矣每有書來矜炫且蒙譏彈予惟嘆
羨之已耳其受之已耳追悔何及哉不但無四
方之志境內山川猶坐限未一經焉如龍藏洞
是已歲乙巳有東道主省祭楊尚卿而緝三尹
東澗李上舍松泉為輔主烏簡拙謝慎菴陳泰
峯二縣尹劉亭山高栢亭二主舍袁汝獲袁汝
為二儒生主客及予共十人於六月望日往遊
洞去城七十里暑熱即日不能至宿於普濟鎮
次日早起倉卒一飯遂出鎮約有數里輿夫走

僕咸赴井邊飲水行數步還復飲之既又數里予
問故僕夫對以過此二十里餘方有水予即苦
渴遣人先行取水迎至半途予乃置而不飲語
云倉無糧飽是饑又有望梅止渴者詎不信然
矣乎入山口路漸巖嶮通山皆青石無雜色見
赤脚男婦數十人擔篋負桶皆隣村汲水者有
山有水為佳村乃山多水少獨龍藏洞兼有之
此其所以為可貴云路旁積石似出人為田父
告以此腰疼崖也人有腰疼者許取溝中石堆

梁崖上量其力而為之大小多寡疼乃止蓋腰
疼多因寒濕所致運石起伏有合按摩屈伸治
法崖熱近之徃徃汗出多愈如岳廟推秦檜等
鐵身亦此意也既而及趙八井名盛而實不副
水自崖上懸注只供數人之飲用多湏立候之
過此則峯巒迴抱草木交加水裁曲岸直而雲
霧亂山平廣場燒痕青而斷崖石色古矣欣聞
鶯語山幽其柰馬疲路澁林深不知暑氣地高
自引清風若夫紛敷濃郁則雜花不可名日愈

探愈奇者森峭壁而排盡戟突峻嶺而掛青蓮
窺斜日而流明珠橫銀漢而飛絳虹也於是衆
友踞虎豹踏峯巖披蒙茸穿窳窳倦極有悔其
輕來者有喜其將至者忽見山僧出透徑達洞
前乃不揖而鏡入焉則見其左虛曠而右幽邃
上穹窿而下孱砢內突奧而外通明野鶴飛鳴
有妨坐語石氣空翠能濕行衣風掠地絕異香
滿座冰從洞出冷氣襲人詩有水自石邊流出
冷風從花裏過來香語雖尖新可作此洞實錄

也然洞本天成勢如發券從者百餘人止占洞
門一區善拋鵝卵石者亦不能及其顛門上一
孔闊幾一丈如天窓然此亦可謂之洞天門向
東北龍牀則在西南高處攀磴而上非身輕者
不能繫龍檐立其傍龍去而遺其跡鱗甲飛動
見之者自是毛髮豎聳向後或卑或高一寬一
狹白蝙蝠大如盤盞倒懸石上見人則舒展其
翅殊不傷人暑氣既免相侵水聲况復堪聽驚
喜如遊廣寒宮名利渾忘長安市矣嘗聞武定

人有史姓者素頗負氣恃膽曾以人日凌曉入
洞中至日夕而出宣言於人覺迴轉前後不一
而向前者多乃一空山也聞水流潺潺路濕而
滑遂不敢窮其源予乃携客屢出屢入出則四
季山環其南斗倒山拱其北東則閔王巖而西
則鷹窩崖兼有二小洞菴乃觀音大士殿乃伽
藍武安王攀翻桂樹則小山讓幽偃息叢篁則
竹林避逸俛仰林壑則禹穴爭奇瞻注懸峯則
龍門失險久之復歸洞中則野筵已辦不惟有

靈運登山之屐而且謝安登山之妓矣在鎮
衆窮妓作戲衣藍縷而聲低啞羞澁殊不自持
至是頓改精魄以洞虛助聲云耳復有攝龍牀
吹簫者真乃一派仙樂客乃扶山靈之秘藏搜
海經之詭瑰繹以藻思蔚為麗篇繼絕響於王
維繼雅調於康樂予因喜而為之歌曰洞形兮
鶴翔洞名兮龍藏睨而視之兮徒羨其空濶即
而窮之兮難盡其深長仰面高兮如旋螺俯身
低兮如陂塘前通一竅兮如戶旁列削壁兮如

房不知潛龍兮何日乘雲雷而雨四方空遺此
洞兮棄幽阻而隔窮荒歌既狂興不可已復為
之歌曰繫龍椿兮卧龍牀始於何時兮名於茲
方鍾乳垂玉箸兮石腦茸比瓊漿吸月華兮吞
日光解拂鬱兮却炎涼可以煉丹砂兮養元陽
非神人之窟宅兮則雲水之仙鄉不但詩興激
發兮而神思亦為之飛揚將欲鑿石為室築
土為牆蟬脫人間之俗累兮終於此而
嘉州喜聞樵歌牧唱謂可盡洗塵土賜曾月令

則云暑月可以居高明遠眺望升山陵是遊可
謂兼之矣山水之勝使人應接不暇豈獨山陰
道中哉宜興有張公善卷二洞興安有噴雷駐
雲飛霞三洞未知於此孰優以待他日有來自
彼方者當問而定之邑西南有一洞亦以龍名
此則又稱東龍洞西龍洞前賢劉文簡曾有記
寓言人心深險不可測韓文公登華山不能下
乃投詩與家人訣別蓋少年狂言譏世之履盛
滿而不知止者非實事也予記則不諷人不驕

已直述一時遊覽之興而已當時離洞月破黃昏還鎮則月可中庭拂枕便睡次日疾馳如城埃再遊則記之因循十九年矣忽聞蘭川魏太守同署印州佐詹崑峯為均地事至其處予又不能陪遊乃追憶舊遊而為之記如此此洞久已屬予托之守洞者前此僧人明月今則明悟魏詹兩公以山地硯確鮮花粒不起科糧免徵則守者能久矣記終因併及之已存告詞更以記作証以防後之無知而混賴者

憶遊南內記

予嘗泛觀三秦記關中記西京雜記及括地志
十道志長安舊志并雍錄雍大記漢宮闕疏三
輔黃圖與夫三輔舊事見其叙列秦漢以來宮
殿觀閣苑園池臺雖蓬萊方丈何以加焉拘於
書生之見殊不之信也及登仕版止知朝殿城
垣市衢公署之盛他則聞而未之見也公暇曾
遊西苑其承光樂成二殿免園萬歲二山并南
臺太液池瓊華島芭蕉園藏舟浦其侈麗誠有

如黃泰泉馬西玄二太史詩叙云云者嗣後清
馥歿未壽宮等次第告成加美增隆更有二詩
集所不及載者矣獨恨南內未得一遊嘉靖庚
子孟冬念又一日同常熟張石川通叅饒別江
都葛芝山上舍托中貴王松溪為主實則藉其
力遊南內而償夙願也各早起聚於東華門同
詣松溪居室茶罷將入席張為二子日子曰何
不請之賢東先遊而後觴乎松溪作而前導予
三人隨之同入延祥門至永明殿華敞炫目中

設御座後置朱金屏北壁懸英宗行在虜地圖左右則呂紀林良小畫殿前構石為山高聳仰望穴山為洞幽邃難窮形勢似出神謀化力非入所能為者攀緣石磴旋螺而上至乾運殿亦設御座左右乃凌雲御風兩亭對峙翼以脩廊環以太湖錦川奇石有懸石鏡曰秀巖巖外二塗金後貌猗猗如生其綽楔曰戴鰲前為昇仙橋橋石純白如玉刻鏤魚龍水藻之文水沉塵而橋卧龍相為掩映且水從金河來潺湲有

聲池之左右天光雲影兩亭亦相對峙亭外綽
楔曰飛虹飛虹外亦置狎梅二後貌盤槐四章
或夭矯如虬或飛騰如鳳或偃蹇如蛇楊雄所
謂玉樹青葱者是已穿山下石道出如隧折而
之蒼龍門十餘步入丹鳳門門側後貌如前檜
栢雜植鬱鬱蒼蒼內則龍德殿入由昭明門石
橋逶迤環碧森巖環碧者其居中殿名也
嘉賓館而太湖諸石怒撐巉巖不可名狀
後列金屏乃倭國進奉者極精美而花臺上一

玄石尤奇題曰劉氏湖山而詩刻乃大德七年
秋由此達瑞雲館夾室各懸山水花卉雜畫中
則高宗物色傳說圖御榻裯褥悉備館後紫芝
軒軒後昭慶殿四壁懸唐馬失記幾十幅自穿
堂抵後室古今名畫世所鮮覩御屏則繪京師
市陌人物各極情態由謹歷左門過皇史宬中
門并延祥門安福右門達崇光殿殿有古柏數
株徑十圍高十餘丈蓋百餘年物也殿內懸八
馬圖曰白兔曰黑五明曰寶貝曰龍駒而紫霜

烏兜神鳧絕輪各有名色亦各有歌出自 英
宗御製殿後為咸春閣殿前為昭融館離館出
休明門乃圓制欽天閣及方制追先閣欽天有
石刻記追先亦有石刻和 宣宗述祖德詩乃
今上宸翰牆外飾以五采湘簾綵遂少懋於其
下覺勳力復初放步競趨環翠殿殿懸出獵大
圖并 英宗盤龍回文詩及元人草蟲前五宗
質殿幾皆灰瓦中官指示之曰此乃 英宗自
虜迴所居衆因嘆曰美殿亭無數顧乃居於此

耶未及細觀出而至清華殿循磴而上見有洞
名瓊林下瓊林經宣仁門登翔鳳樓鮮明何殊
月宮後置松鶴倭屏有昂霄聳壑生動意佇立
楯間而奉天武英華蓋文華諸殿并擬造呂梁
洪曆歷在目前仍復懋洪慶門下主乃促衆起
進洪慶殿殿內供帳鋪陳莫不有法躋仙橋見
御几以泥金作質畫雲龍變化狀未構佛堂堂
前鑿池以別泉暗注之設石盆於池岸泉由岸
隙滂盆上若從地底湧出者緩步中和門中和

門正與廣順門對更自廣愛門徑詣重華殿殿
旁夾室皆設座榻內懸宋元佳畫百軸而塗金
二麒麟頭角駭觀其別所亦設榻多是美女小
畫重華畫處有圓殿圓殿畫處有大殿殿旁夾
室所陳器物不能殫述遊興方濃而麗春門外
惟清和閣閣列石橋橋邊止有迎春館而南內
盡於此矣總其所歷無非雕欄繪壁玉鸞金鳳
香檠蘭麝綺牕珠戶繡楣藻井青瑣丹雘
層軒崇岡廣陌閣雉設睥睨而簷角總翠

以雲氣畫以仙靈金碧繽紛丹青錯落嵯峩閎
連巖窳靚深虛曠穹窿縈紆連屬洞流祥霽濤
湧日華蛟宮畫冥龍壑春闈高臺臨太乙而複
道肅鈎陳峙者流者繚而直者通而曲者蔚而
離離者薙而田田者或翔或伏若倨若恭象天
河比海麓春盤擎露夏室含霜交戶羅萬年之
枝而支機有七夕之石雖枯研池禿頰毫稱述
有不能盡者矣賈山云秦起咸陽而西至雍離
宮三百鐘鼓帷帳不移而具其在漢内外宮房

一百五十所乃黃圖所著宮館百有餘區則班固之言也不知視此何如一代材木人力有限是雖因遼金元之舊而恢拓之秦漢定不能及而制度文為仁義道德等姬周而上之漢不足多秦不待論矣衆歆推此意作記限以年內成之復至松溪所喜而如遊華胥歸來因浮巨觴解勞松溪更邀同輩尹君古瀛李君南江樊君東洲吳君清池入席勸酬四君皆可與談而松溪尤好文重士善善楷書抵暮各趨出不數日

芝山南歸次年石川官罷亦南予則罷而東矣
日惟潛處山間林下相伴村叟田夫有時望日
瞻雲拜天禮斗自念盛美不可無傳也乃追憶
而記之名以憶遊南內記以踐前諾以示後人
云

章尹董澹溪祠堂記

祠者思也思其人則祠其人生勤瞻拜百年後
方持牲酒香火以祀之故曰立信儀以蒞百姓
則人之報禮董然禮孰有重於祠者章在東方

為巨邑賦差繁重困瘁流移久非其舊而富庶
之名猶在况近省城責辦尤急是謂近火先焦
者也所仰賴者惟賢良有司支持其間困或可
蘇瘁或可瘥流移或可挽而廼之也濼溪之尹
吾章也旬日而條法立數月而錢穀完及暮而
人心服三年而兩次徭徒得其平革火甲而民
安其生省里甲而民樂其業至於洗垢磨銳扶
弱鋤強又有餘力 欽取將行脩飾學宮及士
夫坊牌煥然一新為政雖稍用術智居今時勢

不得不然殊不失燕趙感慨之風邑人德之難
忘乃建祠堂於縣側左有趙祠右有董祠如有
賢尹又當繼祠於其後矣使其在任不能得民
民方憾其去之不早恐其去而復來况有祠堂
之建耶祠雖三間而宏麗如一公堂自其儀形
雜壘端居於其中善者過之若聞其教詔惡者
過之猶懼其威嚴且可以風勵隣縣及繼來者
於此地者凡川劉侯有德政不日徵遷後者
豆於其間朝 京廻為之索記文於中蓋山人

以其生平樂道人善而文華方有虛名山人對
新感舊不忍固遣遂為之作記刻石以永其傳
董名文宗字汝和號溱溱金吾衛人劉名田字
仲龍號見川南陽衛人皆甲科名進士督其工
者鄉人馮棟張棟而倡其事者則徐振賈孟陸
與夫李楠齊守富也

江樓鏞公祠堂記

江樓鏞公諱宏字可容浙之錢塘人世業願願
醫兼大方脉以濟人為事傳之子孫或醫或官

俱急於濟人江樓之因水整救章人其亦有本
也夫正德戊寅六月六日之夜山漲激發掩巨
石以飛奔落懸崖而再觸驚訝蛟龍之聞不分
牛馬之群有如倚柱摧而地維裂河流高起數
丈城垣不沒者三板惟其風雨感天是以波濤
隘地城內大恐城外浮尸不計其數或曰五千
或曰滿萬各村社及近河并居地稍下者四方
過客與夫久住之客難以按查錢公以公務通
至焉痛心蒿目許以厚利亟命水手援其存活

者水落散熟食哺其饑餓者瀆死者給銀埋葬
銜去居廬者計數補助又隨宜區處多方賑濟
章人感之如愛子之慈父母而起死之良醫師
同心造一祠堂祀之以報其德遂留觀中舊殿
一所改構如新外設大門中栽群栢董役者老
人袁劉稟官近書院而為祠者其長子學禮乞
記礎石者則次子學詩也中麓子許之已久尚
負其托近因不款作記者已強為之記矣乃
憶陳跡述其大略文雖不嘉然吾心所願也錢

公又曾勦捕巨寇王堂祭法應記者或以捍大
患或以禦大蓄故前非錢公吾民其魚後非錢
公吾民其虜矣恒弭盜有益於東藩而救民則
有益於章邑祠堂亦惟因其切近者耳至其在
東最久歷署兵備清戎屯田驛傳諸政舉有成
績不及備書有投詞撫臺者撫臺順其情而批
其詞後云批縣縣愛錢批府府半年窮民泣且
訴願批錢青天即此愈見其政矣官由山東僉
事副使陞任廣西按察使福建右布政使湖廣

左布政使止於南贛汀漳巡撫都御史議者猶以為用之未盡其才云

昧泉李方伯祠堂記

昧泉李方伯官罷而歸者十年矣病故而葬者三年矣傳聞歷任之處士民咸感念不忘道遠雖不能盡知觀其居鄉而鄉人祀之躬立祠堂在明水鎮之中央化方德之當亦若此矣生前既留遺像撰去思碑豈有身後而不感且念之者哉劉五思馬本端馮光岳皆鄉人之尚義者

也其為祠雖云首倡實出群心土木之煩工役
之需自有不呼而集者矣德厚祠不可無祠成
記不可後此三鄉人之意而亦衆鄉人之意也
予方嘆良友之不可復作而道貌之不得再見
也遂撰此記以待刻之墻隅陷石或祠側穿碑
然祀於鄉則文止於鄉而在官事則固不暇及
也觀其地讓同氣財無異心嫁娶兄弟子女遺
孤數十人曾不惜費睦族篤親雖在五服外者
亦惟一體周視之遠方孤寒之士投者雖衆無

一人空歸者善柔不倚官勢冷暖不隨世情謙
讓原有家傳孝友出於天性遇農人則教以耕
地之法播種之宜遇士人則勉以讀書之勤為
文之要道上田間見一芥半穗必命同行者持
之或手自取之其不輕易暴殄天物如此故車
羸馬頽僕田夫村城往來隨從不過數人而已
衣食儉朴如寒素未嘗發身著生容見之不發
問則不知其曾官二品而履仕途三十年也古
之鄉先生沒而祭於社故曰盛德必百世祀也

善人沒必為神庇其鄉先生之食報享祀無窮
而鄉人之穰災祈祐亦將有賴矣記中不載家
世字名以別有志述

巡撫朱鎮山祠堂記

官無崇卑大有德政則間有祠堂然祠堂有要
而成之者有私而成之者有因其官尊冀其履
庇而成之者朱公瑄雖尊成之者出於輿情公
論首其事者時軻助其力者鄭偉杜鳴楚孫志
賢而專其工者則府校霍完也完既出地又復

出財其他助力出財者不及悉舉祠在湖南書院迤東基長七十二尺闊二十六尺堂三穩高二丈三尺餘兩廂亦三穩各高九尺儀門八尺大門九尺餘碑二樓亦二門坊九尺有屏門外更有東西兩坊黝堊丹漆華麗駭觀塑像端坐堂中供帳森陳座側入其門者初則肅然起敬既則油然興思熟視之如挹清脩苦節之孺谷而聞教民督吏之德音待其過百年而歷世乃始血食而尸祝之矣嘗慨世之長民者其在茲

也惟恐形影之不幽其離任也自是聲響之處
絕彼既為民聚怨民豈為之立祠耶朱公之去
東而佐部也有來自都下者民必環聚問其食
飲起居及丰神鬚貌之何如以為喜慰民心如
此祠堂之建自不能已而亦事之間見著也民
罔常懷民愚而神古語不誠然乎公在山東為
按察使為左右布政使為巡撫副都御史前後
善政雖累千萬言有不能盡者今并記其槩于
以順民心而昭盛美表成績而勵將來但自媿

素非作者或有負於求者爾據諸耳聞目擊公
蓋鮮有比倫者矣德可感人而又才以濟之量
能容物而又學以充之是以由嚴約釐弊端舞
文者匿名以避恃武者改姓而逃出納詳明解
戶許自行稱允不但數萬銀錢俱有考稽雖數
盃茶酒亦登簿籍督責有司以廉慎嚴刑吏役
之奸貪至於驛傳均徭尤其軫念歲值旱蝗民
多流竄勞來安定有如治病能出奇方禱雨食
蔬衣素夜夜拜天不令人知之瘟疫盛行遣官

施藥多所存活東路雖常南北之衝一夫一袂
各有名數或迎或送自無苦難田而食廬而居
膏而通工而安士子誦讀學社老幼嬉遊里閭
無復愁苦者誰之功耶有此功宜其有此祠要
耶私耶出於冀望耶皆其所無矣但在官樹碑
有禁宋璟當國廣州民刻石頌德璟力止之公
今不在東方事出輿情公論者自不可禁也羅
生蘭舊嘗從遊因衆意索記於中麓野人門墻
之分鄉曲之情又大工而且義舉也難於固辭

遂書此以勒於石以久其傳朱公名衡字士南
號鎮山江西萬安縣人嘉靖壬辰 賜進士見
任吏部右侍郎登第年二十一今方五十四事
業殆將勒銘鐘鼎圖形凌煙寧獨一石刻一祠
堂也而已哉

跋語

兩京賦跋

嘗聞國初高麗使臣每以朝賀上京出百金購兩京賦無應之者使乃嘆曰豈以天朝而無兩京賦耶有古峯此作可以塞其請矣

泰山賦跋

中麓子嘗欲為兩京賦不意古峯余子先之復欲賦泰山而泰峯陳子又先之苟有作者足以揄揚昭代表重鄉國斯已矣又何必出諸我

跋宋元扇面詩畫卷

片言可以通玄小道足以考古滅鐵敗漆缺鼎
斷琴形有款識之可尋字或漫漶而難讀皆鉅
人達士之所不廢也至於扇畫藝之末也短詩
文之餘也蓉池葉子集而卷焉表而著之焉則
夫天下大善言古今名品物又安有遺於葉子
者哉

跋伯牙鼓琴圖

伯牙鼓琴圖一卷不知何人所作觀其筆力精

妙旨是宣和間入院高手嗟夫伯牙以鍾期之
死世無知音之人而為之絕絃今畫工之用意
如是而世無知者則伯牙之絕絃非過激也此
圖為延慶講師秋崖旻公所藏則秋崖者豈畫
工之鍾期哉

跋廣川書跋

脉泉李方伯自滇中過家惠予新書二冊乃廣
川畫跋新都楊升菴校而刻之者也其跋畧有
曰原得之館閣與同寅王舜卿共傳寫之又

書跋六卷訪求未獲海內藏書家冀或有之同
刻以傳亦斯文章事云予因掩書歎曰升菴以
掄魁績學大有功德之胄也久罹遠戍不以爲
戚惟以好古道表遺書是急如廣川畫跋其一
也此其志量可與躡躡淺狹者道哉二跋敵續
俱有之有感於此遂亦校而付之書客刻焉以
成其志以爲完書嗚乎廣川乃宋董道氏世居
廣川過時於宣和間而以遊藝擅名夫以道君
收箴而董生賞鑒宜其精絕如此然畫猶爲藝

之次者至於書則契二儀之道該萬彙之理古
之人固嘗言之迄於今不可一日無焉者也自
古文籀篆變而為隸為八分為楷為行為草為
飛白其著論以示手筆而傳心法者何止百家
自予所及見者論之揚子雲訓纂鄭迴溪書衡
衛恒能書錄王愔文字志徐浩古跡記庾子山
書品張懷瓘書詁孫過庭書譜唐之墨藪宋之
書史逸少得白雲之授夾漈出孔壁之藏皆可
存古而詔今闡微而昭秘者也書跋大畧得之

所以為可傳而博學君子尚之也升菴近有一
書索戴伺六書故等籍行即各錄副本乘風寄
之以酬宿諾以投雅好云

淳化帖跋

中麓子向為太常少卿提督四夷鱗在東安門
右與蒲汀書屋近而且便時時過從繙閱書冊
一日索觀字刻因出淳化帖相示殊不愜意復
出大觀帖則驚心奪目若與古人對語者云一
得之書肆一得之豐五溪而書肆者尤佳榻本

若此不知真筆又當何如蒲翁問予二帖何以
得名予茫然無以為應也近因觀廣川書跋而
詳求之則知宋太宗購天下歷代名跡又出御
府所藏命侍書王著翻刻釐為十卷卷尾題以
淳化三年奉旨勒石每大臣登拜二府則以一
本頒賜後因不賜遂為難得以其精妙世爭慕
之目之曰淳化帖云及至大觀中又集古跡刻
石於太清樓標題皆蔡京書卷尾題以大觀三
年奉旨云云後又取貞觀十七帖總為三十二

卷謂之大觀太清樓帖二帖之始末如此惜蒲翁已仙逝不得以此語轉告之耳呂江峯曾以淳化帖求中麓子品定中麓子因據而有之江峯善書而予不善竒物正可為不能者之物江峯一笑而擲之此吾原意也然予素善篆曾不假於譜而學書則非帖不可此帖比之蒲翁大觀遠不可及視淳化初刻亦不甚類或紹興監本或建中靖國續帖冒以淳化年號亦不可知雖然亦為稀遇鮮有者矣虛窓展對之餘因題

數語以紀歲月并所由得云

荆川詩卷跋

荆川唐子晚年詩似信口有意味有心思書似信手有骨力有神氣公子視瀛菴者寄其存日所書立秋詩一卷無奇語而未嘗不奇如老態而殊為不老令人終日相對忘倦憶舊不能不繼之以悲或者謂其竄入惡道流為俗筆其亦淺之乎知唐子者哉

雪簑效禹碑字跋

雪簑是刻更覺奇古超出筆墨蹊徑之外其學

鳥為文邪揭之屏楹恍如遊帝禹之庭矣論字
學之精者古今有三書書苑菁華墨池新編及
鄭氏衍極使其見此有不深許可者哉

越絕書跋

越絕書最高古說者以為子貢之徒所著其終篇
有姓去得衣名米覆庚之文細思之乃袁康也必
東漢會稽人以漢尚隱語及禹葬之鄉明之也
楊升菴更推同作者為吳平是又予所未及也

園林午夢院本跋

呂東萊曰形接為事神遇為夢樂廣曰形神所
不接而夢豈想耶予年三十以前晝所接見人
物經遊境界夜則夢之非接見經遊通宵無入
夢者所以無異夢且不喜談夢兼不甚信夢云
嗣後年長而神不清名成而心患失妄想過憂
出入蚍蜉穴而遨旋槐蟻宮冀江淹五色之筆
而歎丁固三公之責異夢時時未枕上矣兼有
兩重虛而夢中說夢者及退居園林如夢覺來
心定而神復清栩栩成莊而周公不復親孔矣

午夢院本之作其在何時耶觀者不待予言自知但望更索諸言外是則為幸不淺耳

至人無夢太上忘言午夢甚於夜夢啞禪涉於多言視至人太上不深有媿乎

此總跋午夢
啞禪二院本

楊氏暨侍婢死節事跋

嗚呼紅顏多薄命白首全歸婦不幸而喪其夫守節終其身者鮮矣况即以死殉之耶籠鳥無常主風花不戀枝人家豢養奴婢能不欺而背者鮮矣况肯與之同死耶今觀姜妻楊氏

之死節女婢盛兒甘與同之楊氏蓋女流中之
僅見盛兒亦侍婢中之絕無者也皓齒作機頭
之斷青春委梁上之塵楊氏可風女流金盞覆
無干之水玉琴拋未續之絃盛兒可風婢輩予
為楊氏作記語及盛兒者甚畧特為跋而補之
刻之碑陰亦闡微之義遠賤之禮也盛兒姓劉
章丘城南明秀鄉人名彥明者則其父也

邢尹善政錄跋

作縣如臨邑邢尹若豈非鮮哉嗚呼豈惟鮮於

三十年之前三十年後更為耗土國色

語曰耗土之人

醜

而空谷足音何也自俸門關而昏夜乞哀者

多矣貪風盛而白晝搶劫者多矣賄以速於化

酷以濟其貪官非其人而民失其所者更多矣

至於縣尹近民而獨權善惡尤易為力有履任

不一年即搖格數十命科取數千金者王法安

在天道無知耶昭昭法網雖則一時暫免恢恢

天網實則疎而不漏報應當亦不遠矣今首貪

蠹斥

朝政清明偶得善政錄竊有感而大有

望爲因題跋其後傳示司牧者或有所激發云
予自舉於鄉會試道經臨邑已而官於朝出使
往逆親見邢尹之善政果宜於民而賢於人不
但稱於鄉官管一初邢宣甫闔邑無衆寡同口
一辭不但思於始去無久近而思之者有如一
日嘗觀司馬溫公官制遺藁分列舉按條目舉
者仁惠公直明敏清謹而苛酷貪縱皆其所按
者也按者正中今日之弊舉者四事善政錄皆
有之書曰德惟善政政在養民政善而民之生

養遂生養遂而天下之太平立見矣奚用外焉
以求法治為邢名第字進卿北岡乃其仕號直
隸長垣人嘉靖丙戌進士以御史養病卒於家
安得起斯人於九原并得如斯人數百輩布之
巨邑以風勸旁邑庶尹哉邢在臨邑歷丁戊巳
凡三年嗣後非無善政然而鮮有及之者

跋大公集跋

向予在吏部日太宰乃汪誠齋而左右少宰則
霍渭厓與張甬川也九堂稿兩堂看畢而後呈

之正堂在刑曹則然其他臺省則否而吏部尤甚故有侍郎不如正郎副郎不如外郎之謠謂厓以稿有當刪易者恐戾舊規告之誠齋誠齋荅以當開心見誠勿分爾我而甬川亦云然手簡徒復得古人大公之道凡陞選奏草一切大政俱從公商確名其簡為大公集刻示將來四司各有跋語予為其屬未免扶同於其後其為言曰嘗考慶曆名臣范文正廣大真誠富文忠明敏果銳韓忠獻爾雅質直是其性則殊矣至

其定國是決朝政論官論才各出所見初若不
相下父之叅伍錯綜恢弘注措無不尊主庇民
登良黜劣真乃異姓兄弟同心為國上殿相爭
如虎下殿不失和氣者也三公其今之古人歟
其原委如此予今為林下放言之人當敗添歎
字韓非子有云莫三人而迷妄謂一言以蔽之
矣未知見者以為何如

幸曉見編跋

是編刻成西野翁乃以一冊坐臥與俱分送遠

近相知不下百冊即於是年脛瘡為害飲食戒
而告終臨終自嘆所不忍舍者三事西村沃羨
無人者種滿腹元詞世未盡知良友如中麓不
復會合時則嘉靖丙寅十一月十九日享年
八十至次年隆慶丁卯十一月初十日始克成
葬題其碣曰明詞人西野黃先生之墓